

## Awe nochi tin ultimo Town Hall Meeting

*Prome cu Ciere Temporal di Branch di ELMAR*

N.V. ELMAR ta informa comunidad di p'ariba di brug cu awe nochi lo tin e ultimo Town Hall Meeting prome cu e ciere temporal di e Branch di ELMAR. Entrante diabierna 21 di Februari e sucursal na San Nicolas lo inicia su prome fase di renobacion y pa es motibo e sucursal na San Nicolas lo keda cera te cu proximo aviso.

Tur cliente di San Nicolas y vecindario, sea bon informa cu dia 20 Februari lo ta ultimo dia cu ELMAR San Nicolas lo ta dunando servicio. Opcionnan di pago online ta keda disponibel via cuenta di banco of via Pay.aw.

Pa esnan cu ta prefera di acudi personalmente pa paga



nan cuenta di ELMAR lo por sigui haci esaki na e siguiente instancianan disponibel:  
Pago di factura na MFA San Nicolas y Savaneta  
Pago di factura na WEB Aruba na Balashi  
Tur Servico na ELMAR Oranjestad of Hato

Servicio di peticion pa instalacion via Contact Center na 523-7100  
Customer Service via email na [customerservice@elmar.aw](mailto:customerservice@elmar.aw)  
Pago Online: Online Bill Payments, Pay.aw, Standing Order.



ELMAR a tene su prome Town Hall Meeting dia 17 di januari cu e meta di informa comunidad p'ariba di brug tocante e proyecto di renobacion di sucursal San Nicolas y kico tur lo haci pa comunidad di San Nicolas. E anochi aki e comunidad a haci hopi

pregunta y ta encurasha tur esnan cu no a logra asisti e prome Town Hall Meeting, pa asisti awe diamars 11 di Februari di 7pm pa 9pm na Teresita Center pa nan keda bon informa di e cambionan.

## Cuerpo Policial: "Ta convivi cu nos comunidad cu e situacion lamentabel"



**Altocomisario di Polis, Sr. Ramon Arnhem mediante un comunicado di prensa a reacciona riba e incidente di tiramento na unda un hoben a perde su bida.**

Diadomingo mainta despues di 5or un incidente di tiramento hopi lamentabel a tuma lugar, na unda durante un persecucion un hoben di 19 aña a perde su bida.

"Na prome lugar nos pensamiento ta bay na e famia di e victima. Nos ta lamenta profundamente for di nos curason y ta desea nan hopi forza den e momentonan dificil aki," Alto Comisario a bisa den e comunicado. "Na mes momento nos ta convivi cu nos coleganan cu ta involucra den e incidente y awo lo mester deal cu e consecucionan. Ta importante pa en-

fatiga cu niun di nos polisnan ta bay traha y sali patruya cu e intencion di usa nan arma reglamentario.

"Mi ta compronde tur e emocionnan y indignacion cu tin ariba medianan social cu ta wordo comparti di e incidente. Di berdad, ta crucial pa warda riba e investigacion di Landsrecherche keda cla prome cu nos por saca nos conclusion of speculation.

"Landsrecherche ta un instancia independiente cu ta percura pa e investigacion cana su caminda manera mester ta. Nos tin pleno confianza den nan profesionalismo y nan experticio y lo warda e resultado di e investigacion.

"Nos kier enfatisa cu provoca violencia of rumornan

di culpabilidad sin base basa riba speculation ta inadmisibel. Nos ta monitoriando tur plataforma social y lo actua contra di tur esakinan," Sr. Arnhem a adverti.

"Na final nos kier a señala cu tin speculation bayendo rond di coleganan cu na niun momento ta involucra den e caso en cuestion. E ta inhusto y dañino pa cu nan. Nos ta pidi na tur hende pa no share informacion cu no ta veridico. Mi ta mas cu sigur cu e investigacion di Landsrecherche lo trece claridad kico exactamente a tuma lugar. A base di e resultado si ta necesario nos lo tuma e medidanan necesario.

"Un biaha mas nos pensamiento ta cu e famia di e victima y nos coleganan di e incidente tragico aki."

## DOW: Inicio di proyecto di renobacion di cancha di tennis na Baby Beach



**Departamento di Obra Publico ta desea di informa e comunidad di Aruba cu entrante diabierna 14 di februari 2025, ta cuminsa cu e proyecto di renobacion di canchanan di tennis na Baby Beach.**

Pa e trabounan tuma lugar ta bay cera e 2 cancha di tennis pa publico.

E trabounan relaciona cu e renobacion di canchanan di Tennis na Baby Beach, lo tin un duracion di 120 dia di trabou.

Nos ta pidi bo(so) persona comprension y cooperacion pa e trabounan cu mester tuma lugar y ta pidi disculpa pa cualkier inconveniencia cu por surgi.

